

呂
子
評
語

呂子評語餘編卷六

小題觀略內摘錄

時下文字皆自以爲有法。而其實無法。統命曰顛預。顛預之患。由其初未嘗精講於小題也。大題言盡勢足。雖精微難求。而體貌易設。渾舉崖略。猶可鋪張成篇。小題變動不居。半句隻字。稍有增損。卽全理爲之改易。邈不相通。不得其道。坐受畫虎捕鼠之誚。故有自詡尊宿而猝拈枯窘。閣筆失措者。其思素浮。驟遇生徑。則苦澀而不能入。其間架龐忽。束縛於險仄。則昧布置之方。然後知其向所爲鉅篇鴻構。原有所未盡也。先輩大家多從此用力。故於大題之窪突。肢腠。曲盡其妙。而機趣發乎天然。無泛演怙懣之病。今之學者。自初爲文。卽不講於此。而遽求速化。逞空鄙之胸。造曼繆之習。微倖苟得。反取其套數之緒。餘以爲小

題欣然自以爲無難。誑惑後生。轉相仿竊。幾欲笑古人之徒自苦者。宜其顛預而更不成文也。乃論者不此之爲救。反謂小道無當於性道經世之學。而思有以易之。夫盈天地間。萬物萬事。無非文也。故曰皆備於我。若曰吾得其要者而已。是紛紛者舉不足問。則已取所備者而盡棄之。吾知要非其要。而得非其得。此之謂義外。自告子陸子以及近代良知之謬。未有不出乎此也。聖人教人。豈不欲其務本而達用。而曰興於詩。詩之爲道。何與乎本與用也。然聖人以爲可興觀羣怨焉。事父事君焉。多識鳥獸草木焉。又何說也。記曰。不學操縵。不能安絃。不學博依。不能安詩。不學雜服。不能安禮。不興其藝。不能樂學。小題之道。亦如是已矣。論者又曰。吾非惡其小也。惡夫摹肖唇吻。則訕毀駁駘。優點滑稽。便嬖駸駸。無所不效焉。斯不可爲訓也。其辨吾亦

取諸詩。近代叛攻朱子者。謂朱子於詩廢序說而入之淫風。不可訓也。然桑中氓丰。雖序亦以爲淫亂者也。其詞曰。期我乎桑中。要我乎上宮。送我乎淇之上矣。乘彼坻垣。以望復關。以爾車來。以我賄遷。俟我乎巷兮。悔予不送兮。又何狎褻纖醜之曲盡也。不識當時師儒將廢此數章而不講習歟。抑別有說焉。而序又不足信歟。曰。此其爲刺也。夫爲淫亂者之詞。而所以爲刺。又烏知夫摹肖唇吻者之非。所以爲戒歟。古來稱文章之雄者。曰左。曰司馬。左氏於弑逆荒亂怪誕不經者。樞寫尤精彩。司馬氏傳刺客佞幸奸雄權詐者。極意刻畫。令千載下覽者如壁觀焉。使二子者而在。今日幾何其得與於斯文也。夫美惡是非邪正。人事之必然也。聖人立言。詎不專取夫美者是者正者。而必反覆互對舉之。何也。孟子知誠淫邪遁之言。而後聖人復起而不

易正以是也。故狀善而不極善之至，不足以感奮。狀不善而不極不善之至，不足以創懲。極其至者，善與善不相蒙，不善與不善不相混。化工賦物，萬彙流形，皆自然而然。盡古今事理言語之變，而至道行乎其間。此小題之義，通於詩，卽凡爲文章之法，以進之性道經世之學，無有二也。又何顛預之患之有。代

小題爲初學從入之門。門徑一誤，終身墮坑落塹，如蠱入腹，後雖知而求治，難愈也。故子弟爲文，須先遠俗派。如時下油口活套兒，曹習之旬日便肖，不數月輒成，使之解脫，卽生龜蛇，箇白首不離毛病。凡爲父兄師友，當如妖魔狼蠆以遠之，不可以不厲也。

小題所以盡文字之變，除是天地間義理所窮，心思所屈，無可復生處，則已。有則必須生盡，故是集家數最博，不以成格限之。不

以偏嗜障之。然其中指歸固未始不一也。韓公云學焉而各得其性之所近。初取所喜者引之。繼取所逆者治之。漸推漸廣。無所不學。而後能自成一家。此之謂得其性之所近。若專守一格而不知變。未見有得者也。由淺及深。自正盡奇。是在教者因其材當其可而施。不陵節焉耳。

小題尤重者法。法無定本。只以恰肖題位。割清上下。不可增損移掇爲率。近日鑒油滑之非法。思有以變之。是也。然不得其真。必以龍疎爲大方。以蕩軼爲才情。以脫落爲高致。此無法之弊。與非法罪均。程子所謂扶醉漢扶一邊倒一邊。非變之善也。又有一種假先輩講說印板泥塑。困縛文人心思。坐置腐爛無用之地。名曰死法。壞却後生好材質。不少學者知非法無法死法之不可爲法。則真法出矣。以上附錄

文無古脉。無心得。縱合拍。只是邨俗講章支節。不可以言文。猶演義盲詞之不可以言史也。說理題能無一不本訓詁。却無一點訓詁氣味。尤難得。

立柱分股。固是古格。然出之須變化生動。使板煞字樣。又成甚文字。古人立柱之法。亦只要每股各有意義。不合掌。不倒亂。不復疊耳。今之論者。但取字樣。吆呼道破。卽以爲得法。而其中毫無意義。或仍不免於合掌。倒亂。複疊。則立柱適增醜惡。爲不讀書人開支架捷法矣。故論文總以意理爲主。莫墜死套子下。

小題文得大家氣魄。尤難。似不工而工。似不密而密。非可從套數求之。故難也。閱近文如點徒與猾吏獄辭。越舞文律例。越欺罔無情。直是死囚活計耳。

前輩論如題法。謂文之全體義理。不可倒亂耳。非指字樣也。近見

雖曰未學等題。中比必用雖字直起。或作者偶然爲之。亦是雖字假象。未是正身。借作遊戲法耳。遂稱傳爲不易之式。極可鄙笑。如孝弟也者。股尾定以也者。押字皆此類也。

凡文波瀾映帶處。巧而不鑿。不穢。其得法只是善於用側。

慶曆以前先輩作虛縮題。只認得本位界限分明。步步倒縮。節節順生。到恰好處便住。而下句自然接合。此爲動下神品。慶曆以後始開挑逗襯托法門。似巧而實拙。似靈而實死。已犯續尾添足之病。非古法也。今文并不會慶曆之挑逗襯托。而別撰一副當醜調。卽在聖賢口中自作吟呼。自作商量辨難。曰我動下矣。究竟下何曾動。贏得搖頭擺尾。做出許多惡狀耳。

凡文用經用古。全在自已開點得妙。則頑鐵皆黃金。僅據詞句以爲點染者。反使黃金成頑鐵也。

如小車無軌等題。今人都避實蹈空矣。然則捩拾者卽得爲實乎。曰是不然。凡典而切於題者卽爲實。不切於題者卽爲空。如確是小車。移作大車。不得者卽實也。寫盡一部考工記。俱屬兩句通套用得者。卽空也。彼徒於形貌求之。毋乃論文之下乎。

凡虛題入手卽出題面。更無餘地。不失之窘。必失之露。先用虛翻取勢。入題後逐字鉤劃。使下意躍然欲出。却又一筆攔住。方極得步虛之巧。

搭題提挽爲易。過文爲難。過文多不如少。有不如無。庖丁之解牛。所謂恢乎有餘地者。其間原不容刃。然而劃然已解。躊躇滿志。此手法不傳也。

搭題不難於提綰穿插之有法。而難於轉換融鑄之無痕。時手遇有反玷等題。只會簸弄虛字。如云有之者誰乎。夫誰得而

有之技蓋止此耳。見有考核詳明箋疏華贍者不識之曰太古與則謂之爲不靈動。邑犬羣吠吠所怪也。然典博矣而用意處句句有對照。煞合處恰收住語位。此所謂法也。有法乃爲典博。否則爲堆砌而已。

文之妙在鬆。鬆之妙在筆快。筆快之妙在意多而語雋。則無閒文衍調。一句閒衍便謂之泛。謂之懈。謂之庸率。不可以語鬆也。情形不真。意致便改。故不窮世故之變不足以盡事理之極致。文章高下傳與不傳亦在此耳。

點染襯貼處皆出入風雅。滿幅經籍之氣。此爲雅音。今日除講章俗文外不知宇宙尚有何書。而欲求大雅之復作也難矣。

凡虛題須看其虛在何處。虛在上較急。虛在下較寬。急則不容停筆。故當以虛養之於前。寬則尚有餘情。故當以虛宕之於後。

取下文先輩善用順逼。至慶曆後始作反激。極易討好。然不及先輩處亦在此。

假先輩論法度。分做者必不可合。截做者必不可併。不知能手卽股股合併做。而未嘗犯複疊合掌之病。則以其意思多。論不窮也。故講法則死。得意則活。

沾沾上下呼應。綰結法愈密。氣愈弱。綳布紐捏。都成兒戲。安得更有閑議浩氣耶。故作小巧文。須具真本領。大氣魄始得。

凌虛之文。須有奇情。有快腕。有古文間架起伏。乃見勝場。不則如游絲罥塵煤。愈袅娜飛揚。愈見其蕪穢耳。

凡文惟其義圓。故機趣皆圓。機圓便俗。義圓便雅。

張文忠公集云云。其摺振也超忽。其起滅也幻詭。令人不可捉搦。不可正視。不可摹仿。得南華之神奇。而理法又適。

在園中。其孰得而近之。○章法離奇恟恍。意論橫恣莫當。三句一滾屈盤。不作挨聲討氣之迹。而逐字層折而出。此精於如題之法者也。時下以喝露強排膚衍軟襯爲如題。正未夢見在。使熟讀此種文。初時茫然無依傍處。久之悟入。把柄自生。自然縱橫如意。無不合法。其樂當自知也。○而也雖亦諸虛字。一氣看來。方活纔著呆行。便失神理。故虛字有緩有急。有虛有實。有含有分。不在節節逗唱。字字印描。此又精於做虛字法也。

連章搭題。聯結渡卸諸法。不難難在卷舒出落。純以灑氣經行。若得之無意。而極力用意。所不能到。

樸實簡老之文。每嫌澀縮澀縮者。理不足而氣不達也。惟理足。故每股可化作數股。每句可化作數句。惟氣達。故以數股數句爲一股一句。而其中頓折盤旋。沛然江海岳麓之觀。

凡虛題善於曲折處理。藏正意於縮咽處。勾留口氣。故極透露。又極含蓄。而醞藉冲夷。無近來麻軟習調。甚難。

小題固以花簇生動爲佳。然使無層出意思。則雖欲花簇生動而有所不能也。時手技窮。輒舍意而求之調。三疊四疊。徒增醜態耳。

凡作疊字如申申天天與與切切惻惻等。都要從實際做出。乃佳。今輒以空腔調弄。或借偏旁反面疊字挑剔之。皆沒本領人無聊活計也。

兩句相似題。以移掇不動爲妙。若庸構則換却詞語。彼此可通套矣。一則無法。一則腹白耳。

作文一落筆卽思作轉。李營丘郭恕先畫一尺樹。必無一寸直棧。此卽文家三昧。然有學轉而反成輕薄者。此非吾之所謂轉也。

吾所謂轉轉以意彼所謂轉轉以詞轉意極難轉詞極易學轉者當於轉中求難不可於轉中求易。

鄉黨篇數節題映帶之法亦人所羣趨也所貴考核詳明詳明矣又要穿插穎巧穎巧矣又要筆力雋古具此三者爲難。

點綴都從內則周官便使最易俗題用之皆新奇然所謂新奇者自有在也若復於周官內則中求之是卽糟粕陳腐耳矣。

凡題字點染多意識少卽就無意識處生意說連點染都活此是空中樓閣法得之可以不窮。

治審以贈治俗以雅庸人之所謂難也作家則又難在刻劃精切運用無痕處耳。

虛題法論之最悉矣然又須看下文層次有虛一層者有虛二三層者題面雖同而下文各異則局亦隨變矣如雖疏食菜羹與

雖車馬句其面酷類然彼處車馬要看得重此處食羹要看得輕彼題虛二層此題虛止一層也故一樣雖字却是兩樣是又虛題一解

串插映帶作家與俗工同此蹊徑耳只是出手不同一則費盡氣力不得討好處一則若不經意而其驚其巧此豈可以死法求之

音節古峭難在有排宕之氣機局緊湊難在有寬遠之神讀歐陽各傳總論法度森嚴中自見變化神理高淡中自露精采故方幅俳儷之文只如散行文字此深於古者也

有下落語還他有下落不打破語還他不打破儘覺境界無窮只是未說近時善於撲斷說近時善於縷開既說了善於活脫題本以不解解之作者必強作解自取觸礙究無是處此卽禪家

所謂一句合頭語。萬劫繫驢橛也。巧者卽用觸礙反面層層翻駁。只留正位不犯。君來路。我歸路。人生會有相逢處。又生方便法門。

割截題不患不知首尾生情之法。正患泥法而背理。徒見惡俗似有法。實非法耳。如孔子與之坐。至使者出一題。坐出二字爲首尾。關目固也。然坐字有意理。出字無意理。苦於對照無情。強爲牽湊。於是將出字穿鑿出許多俗解。寫得夫子與使者排場做作。皆有機鋒公案。非背理之甚者乎。此自以爲首尾生情。而實不知以虛對實之法。乃所謂無法也。若其安頓自然。有意理者。還他意理。未嘗喧奪。無意理者。還他無意理。未嘗枯寂。而關照有情。神氣一貫。乃大家至精之法。此邪正之辨。不止雅俗也。無一股一句不恰合題位。此法也。其中賓主正反。皆以奇思出之。

巧也。而其奇思皆從經雅中議論證據而得。學也。法生於巧。巧生於學。此所以貴乎讀書也。今人不知五經爲何物。而紛紛論題論文。以爲法應如何。毅然以其粗心白腹爲之。曰已得法矣。無惑乎其日趨於污下而無法也。

題貴省得出。却遺不得。貴插得入。却添不得。善省者在趨勢。勢逆則逆。勢順則順。輕重曲折。映帶而出。或一筆而得數節。或一語而得數句。隨手有無。忽隱忽現。此省得出也。善插者在起波。波平則收束。見奇波起則轉換入妙。遠近斷續。接渡無痕。或頻呼而非真。或暗度而不覺。前斷後截。各還天然。此插得入也。凡游戲尖巧文字。使俗腕爲之。定成演義笑府。最墮惡道。故非明理而熟於古者。不可妄作也。

偏將人情粗淺意。寫入理致精細中。另有異樣神彩。此非大家老

手不辦詩家不解少陵長慶善用俚俗妄生議論只坐無此見識力量耳。

題必有要猶之先王設險無地不到然而秦之殺函鄽之虎牢則要也得此則勢如建瓴矣。

案在前斷在後或先立斷而案應或案斷並行其法皆本於左傳惟史記善用之。人多謂左傳每先經起傳亦不盡然也左傳原自成篇編次者以經附絕之耳。

廬陵與高范二司諫善句句罵他句句却原他寬一步正緊一步退一步正進一步凡文用此法正是深文非平情也若認做爲彼出脫卽爲作者所愚矣。

凡爲合傳兩人非有甚同處則其文不奇兩人非有甚異處則其文亦不奇非有甚同是以磁引銅也非有甚異是以水益水也。

此須於遠近離合之間思之。便得其理。

單句題。惟挨做。故層次應接不窮。惟拆做。故翻覆出沒不窮。弄手非鶻齋。卽亂竄便窮矣。

敘事用散體。借幾句史贊套話。作假古文第一。可憎。以其無意思。議論也。意論多。則轉摺自天矯起伏自縹緲矣。

單句拆做。固得法矣。然人能拆做。不過顛倒空行。能逐字有巧思乎。卽有巧思矣。能逐字有來歷乎。故天下極奇極幻文字。正在目前。經傳中自具。不患手拙。但患腹枵。

文境幽峭雄悍。而步驟出落。又自然安閑。此從柳州集得來。非時文中所有。俗眼針剗不入。定以爲削淡無味矣。

老手高人。祇是巧生於熟。熟生於切。

能手須玩其空中落想處。接頭落筆處。必從人四際路斷。忽然開

出異樣神奇。却正是順行穩步。鈍漢悟此。生多少無碍真實法門。

搭題有字面之映帶。有意理之迴顧。字面之映帶。貴無意。惟無意。故巧極而位置不素。意理之迴顧。須實發。惟實發。故樸樸而意態橫生。此之謂大家。

長題難在折處。折處須極縈紆。搭題難在渡處。渡處須極輕快。明理而有爽氣。纔不入講說家壁落。此是身分高貴處。

雖極說盡題。必有遠神。須向言外遊行。雖極空冒題。必有正旨。須在言內埋伏。實者虛之。虛者實之。

相題之訣。只在善拆。善拆便層出不窮。若割割寫。則無變化矣。用意之巧。只是善借。善借便字字雋異。若呆實寫。則無生發矣。

引證題。叙事天然。議論天然。不患其不能整齊。但患其不能參差。

言言卷六
整齊只是平庸。參差乃見奇巧。但又須尋作參差不覺作參差之妙。

凡題位甚窄者。逐節作緩。緩可也。開不可也。處處關合章義。點逗翻辨。皆所以避開也。文無開筆。便是奇巧。

凡提挽以掩映爲巧。直犯爲拙。做上句便隱然有下句在。巧也。至其做下句處。竟若呆挽上句者。拙也。惟有意者能爲巧。人所知也。惟意盛者敢爲拙。人所未知也。

理題有經學氣。無講章氣。大是難事。

凡做極空活道理。其妙處只在靠實。

凡文劈頭盡情駁翻。逼到開口不得。此下不爲大謬。卽成大奇。是亦淮陰背水陣。所謂置之死地而後生者也。然議論痛快處。每不免蘇氏縱橫之病。又須分別。

文無典據不成其奇。然使搜遍周禮考工奇文竟安在。乃知仍在吾看題之頃耳。其法若何。曰。只要看得題字碎極活極。方能用得考工周禮等書以成我之奇。

凡文之妙。在無閒話。搭題之妙。尤不可有閒話。凡文之所謂閒話者。空放一句。便是閒話。搭題之所謂閒話者。實講一句。便是閒話。做上句。便在下句。在做下句。便在上句。在做中段。便有上下在。令讀之者。應接不暇。目不及瞬。方謂之無閒話也。

割裂題。全看他渾成。渾成者。奇巧之至。若出自然也。無奇巧而講渾成。則膚泛而已矣。忙宕題。全看他生發。生發者。博辨之至。確切不移也。無博辨而講生發。則粗鄙而已矣。

文貴雅而昌華而則。日見枵胸。俚吻。集濃醲之鄙語。奉吉祥之乞詞。自以爲得金馬玉堂之訣。不知其於題爲膚。於文爲俗。於品

爲汚於心術爲邪也。

凡轉筆之捷。其來必紆。一句將轉。數句前必先有布置。其勢欲下。其理已足。故一句卽轉耳。若已至此句。然後索轉。只有撞壁住。豈能轉。又豈能捷乎。今人不求所以捷轉之法。而徒欲其轉之捷。其不入於空滑者鮮矣。

史記之妙。只是摹寫情事逼真。口角形神都到。而奇古在其中。法度亦在其中。非別尋奇古法度以爲摹寫也。

古人謂行乎不得不行。止乎不得不止。予謂必行處要止。便止。止處要行。便行。方是文章之至。不如此。不足以爲奇。不足以爲橫。文只有襯托法。如爲長者折枝題。先出長者。見得長者之命極重。襯出折枝極易來。一襯法也。旣出折枝。見得折枝本易。絕轉爲長者。况乎有長者命在。亦襯法也。

層層逆入。故其勢益奇。其氣益厚。其鋒益利。假才情俗陵駕只曉得頭一皮粗淺翻頭。亦自謝逆勢。却是朱子所謂只弄成一條死蛇不濟事。

頂上句陪伴本句。卽是糾纏。就上句脫出本句。便極清楚。一邊是從詞語上膠粘。一邊是就意思中褪出。老稚妍醜。迥乎其不同。如徒以頂接上文爲秘訣。猶皮毛之論耳。

文有一定做法。無一定局法。

凡奇文無確切根據。是爲野非奇也。

文法云云。語意中以爲必如此轉。偏不如此轉。意中以爲必不如此轉。偏如此轉。人不能轉之意思。看他轉出。人不敢接之。句子看他接下。凡有出落。必令我不見其蹤。突然而出。令人大驚。此皆非時文家所有法也。

文有文之轉折。題有題之轉折。能使題之轉折。隨吾文之轉折。不以文之轉折。隨彼題之轉折。則得之矣。

吾嘗謂虛題看虛字。若豈惟民哉句題。虛字却在兩頭。不特豈字一點便盡。卽哉字亦不可點。何也。哉字氣勢爲豈字所促。一點之後。再轉不去矣。只將惟民二字層次。拆翻豈哉二字處處遮攔不放。求幅始出豈字。結句始煞哉字。非故爲做作也。題勢不得不然耳。

小題生發點綴。村學究皆能想及。此所謂臭腐非神奇也。其點鐵成金之妙。只在用筆處。得用筆之法。則尋常意思。皆成靈異矣。叙事題。却又於題外別尋情事。尋來又正是題中緊要。一句勝百句。一筆省百筆。故妙。不然。卽是節外生枝。屋上架屋。

極累墜題。舉之若無。西人精於轉重。奇在輪外用輪耳。背關智不

關力也。

援引典據使俗手出之皆成臭腐故著色之妙亦如以索貫錢作家先要尋取這索子。

惟雅而巧愈巧愈雋巧而不雅都成惡道故必大家數方能作游戲文字。

凡文之至者未有不動人者也其不動文未至也文至矣情卒不動者其今之文人乎何故曰其性與人殊但知文之能決科而不復知有忠孝也。

句句用突勢而能不竭者得轉換之法也轉換須先識死活以活路開以死路合自然轉換不竭矣。

凡空虛離遠之題須急尋根蒂用一敷衍閑話不著此是文家活路亦是文家死法。

凡著詞語只依稀彷彿者。正如官司捉人。只得其鄰附眷屬。非正身也。天造地設。移易不得。雖意思無加。自能使讀者驚心動魄。方知詞語原從意思生也。

還他步驟段落。而段落步驟之中。能見筋節。此所以爲巧。若使段落糊塗。步驟竄雜。先已轍亂旗靡矣。更從何處設奇乎。

凡搭題因挽挈而生議論者。大拙也。卽議論而爲挽挈者。大巧也。學者當仔細參之。

陶士行之竹頭木屑。方其藏之。皆棄物也。及其用之。則至寶矣。人不肯於平時收拾棄物。顧欲以備倉卒之用。難哉。

文不翻駁不奇。翻駁不重亦不奇。翻駁重而後有危險。有危險而後有驚駭。有驚駭而後有歎服。然非大力不能舉也。

筆勢頓跌處不可直轉折處不可停渡接處不可順。凡文皆然而

搭題尤甚。

雄瑋之論盤屈行墨。但覺妥帖。正如毒龍蜿蜒於禁法指鉢間。直絲絃耳。須知此是翻海擎雲力量。

人謂但題不難於堆積。難於空靈。吾謂不難於輕秀。難於質實。惟不以詞勝而以意勝。乃真所謂空靈輕秀也。

長題不能駕馭。只坐無識。搭題苦多絆繫。只坐欠理。法成於識。巧生於理。其不可方物處。正不可移易處。若離理識而別尋巧法。卽走入拙工死路。曠劫無出頭日子。

用題中字而作鈎搭。最易牽纏無味。而能手但覺其靈快。何也。彼以字面。此以意思。所謂意思者。只於賓主反正間取之。而字面隨之以出。若徒以字面。則糾結填砌而已矣。○又須玩其筆妙。人亦此意思。渠亦只此意思。而寫來自別。只是脫盡俗調新選。

言言卷六
自開看其轉折出落絕不猶人。人所枉費氣力而不能達者。何其省力而出色也。

今之小題家。大概坐不肯刻劃之病。然使今人爲刻劃之文。必成奇醜。何者。緣不讀書。不過鄙俚杜撰而已。不讀書人。總無一而可。今人挨家比戶。皆講變風氣。吾謂正難。有志之士。急多讀根本之書。然後議變乃得。

呂子評語餘編卷七

程墨觀略內摘錄

論程墨者皆執得失以爲招。故卑污者既有低腔墨裁之醜。而其才情自命者又皆以粗疎破碎傲之。先生謂此二家厥罪惟均。蓋總不講義理而但講收束。其無當於題則一也。故先生雅不喜講變風氣三字。謂自周秦漢以至今日文字。風氣無一日不變。何待於人之變之。惟文字所載之道。則天地虧沉。此理不滅。雖風氣極變時。必賴學者爲之救正。孟子所謂反經是已。故先生論文。一以理爲斷。不講風氣。不講收束。亦未嘗專取高奇而厭薄平正也。第膚淺板腐之死法。浮夸軟俗之惡聲。自謂平正。其實似是而非。則闢之甚力。惟恐人墮入魔道。鬼趣斯獨有苦心耳。

凡例

文之高下。不當以格法爲定論。

論文無死法。只看義理切當否耳。

文之貴賤。只在看書。書理切一等。文貴一等。

變幻文章。須看他針線不走處。

居隨義起。似奇反正。此於理有真得。方能自立門戶。非世間鹵莽

變法所能影射也。

說理文字所貴。曰真。曰實。曰醇。不真則雖有如無。真而不實則淺薄無味。真實而未醇。則養之未深。有苦心極力之象。而無優柔厭飫之神。

節次既極安詳。詞旨又復融洽。此種文致。書家之漏痕。畫家之澀鬱。曲家之裏字裏音。琴家之半甲半肉。詩家之不病聲律也。揣摩者撫榻而不可得。乃變爲甜俗真末代兒孫矣。

熊伯龍文云云陸雲若看其一渡一提一結純是古文化境後來學者便成套語評所以學成套語者徒求之句調而不知其有氣骨也然又須知氣骨尚未是盡處緣作者精神止到得氣骨上住故文極蒼古而意理疎薄後來之一折而爲浮套亦其勢然也故論氣骨者又當求之意理

近來講古文以唐宋爲歸再上至西漢而止若周秦手法與心口隔閡自然運用不來矣

施閏章文云云文字足以觀人性學亦足以卜其平生故以貴重爲難然所謂貴重者初不在奇正濃淡間也奇正濃淡止是服飾不關骨相骨相貴重者縕褐袞舄其儀一也惟骨相輕賤而後講服飾試看世間講服飾者必市井倡優與不學之紈褲其輕賤可知矣乙丙之間以詞華爲貴重而流於穢怪乙未以

後以講章爲貴重而流於村鄙。辛丑以後又以吉祥大話爲貴重而流於乞媚。總皆於服飾講貴重而不知其真輕賤也。看此文未嘗不用詞華而自然有鳴鸞佩玉垂紳正笏之度。惟其骨相高耳。學者但當求骨相。骨相旣好隨時服飾其貴重自在。極雕績文字所言精警亦有先民名程所難得者。時論概以詞重置之使枵腹空拳之徒反譏訶爲文弊而不自知其弊之又出詞重下凡幾等也。

孫若士云。勢者馭文之善物。可謂知言矣。然取勢必先鍊氣。鍊氣必先明理。理明則題之體脾族理皆以神遇。諒然已解。如土委地。所謂目無全牛也。但向文法中求勢那可得。

文家惟鍊之一字最難說。此是積學精思浴煅而成。須火候到此自得。不可以貌爲而捷取也。今人不講於此。徒就聲口詞句求

之其軟者流爲熟爛硬者流爲俗賴皆自以爲鍊而不知其入於魔道也。作家之鍊純是筋骨故但見其高雅出羣。

今人最不解鍊字。但團弄時下詞句至軟混熟爛處自以爲鍊。不知其正與作家之鍊相反。作家之鍊正要淘汰凡近獨存古人之精英。所謂鍊者鍊其出鋒非欲其模稜倒角也。

鍊之一字人都不解。輒以詞句之軟混者當之。不知鍊之爲言卽書家之藏鋒。正取其鋒之中正精銳非去其鋒也不用努筋出骨却渾身都是筋骨。此之謂鍊。

先輩必不以上下互插爲高在上爲侵陵在下爲添繞故不爲也。慶曆之末此法始盛然猶以隱然自然爭巧。今則竟有不論道理毫無意思但取字樣互見以爲得法則愈趨愈下矣。

文以高簡勝者筆不竭鋒墨不盡汁而牢籠造化於尺幅之中。書

家之逸品也。時人以枯窘當之。猶俗工作雲林法。謂之禿事。則可。謂之雲林。則非。

近人苦無實際本事。故喜言虛神閑趣。專以挑弄語氣爲能。不知無實際本事。則虛實皆失。有則虛實皆得。故欲講虛實。先講精切。先輩所爭。切一分。便是妙一分。便是真本事。此外更別無奇。無時人閑套頭。亦不涉老教書講章語意。理所至。情詞自備。斯爲大雅之音。

目前事理。却異樣出色。不是另有議論稀奇。所爭思路入細。不入細耳。

子長之文峻。孟堅之文緩。峻故變幻不測。緩故蘊育有神。退之從峻出者也。永叔學退之。却以緩得峻。子固學永叔。却純用其緩。凡得氣脉於古。則其手腕健利有力。舉題中所有。皆成輕便。故出

落高而轉運快。人視爲若不经意而得者。皆其力大處也。

唐德亮

又云云。明快老橫。是所長也。儘多空疎。則於理欠精確。

文人每坐此病。庸流讀之。反棄其明快老橫。而寶其空疎。以爲法。以此歸咎作者。所謂秦人燔書而追罪燧人氏也。

有機神。有局度。有骨有肉。道練高融。此當行作家文字也。然理不細實。便使數者皆減却聲價。不可不知。

題面堂皇。選者多取浮詞俗調充之。大要是叫街喝好語耳。晏元獻譏李慶富貴曲詩。輔裝曲譜金書字。樹記花名玉篆牌。云是乞兒相。看人富貴者。非富貴語也。又窮人強作富貴詩云。脛挺化爲紅玳瑁。眼睛變作碧琉璃。聞者絕倒。時作正玳瑁脛琉璃眼耳。何如梨花院落溶溶月。柳絮池塘淡淡風。爲真富貴氣象乎。

名手舉一切堆垛醲醖之物與一切方幅潤綽之態盡洗而空之而理體未嘗不厚氣局未嘗不大風采未嘗不高華然則文章得失所爭不在腔調間亦明矣

空快文每忌輕佻淺薄而作家橫衝直突所向無前但見其光昌老鍊其空快有本也

挑逗描摹時論之所謂有法有韻也然於題之實處避却如水上毬以不沾帶爲妙亦時之所謂法與韻耳此說自萬曆來卽有之亦以爲先輩中一種故尤難辨

能於題之神氣瞪目久注忽然提筆疾追其所見窮幽歷險只在一眨眼無所不到少鬆一步卽迷茫不可得此種文境須其解衣浴毒龍湫中手段方有此本分逍遙

評家謂語語著實是大難事看來著實未是難著實而當理當理

而自有發明斯爲難耳。要知不當理無發明亦承當著實二字不起。

文章有魔調似演義非演義似科白非科白。此自古文人之所無。故曰魔。然有從極高來者有從極低來者。低者出於學究講章高者出於佛氏語錄。低之魔人易知高之魔文人老學究浸淫惑溺而不知其爲魔。究與講章之爛惡同也。凡文字過高者當首辨而滌除之。

如貧而無詔章題概爲空悟話頭似乎靈妙。大類村比丘說佛法。越神通越鄙俚耳。刻繕名理耐人苦索處。忽然一句半句通箇消息令人言下超然。此却不是弄舌尖狡獪可得。

化題之畛畦。入文之爐竈。所謂鎔成汁瀉成錠。使俗子守之。永飛鼎敗矣。

隨題陶鑄乍散乍整整以還題之實理散以發題之虛神而得力
尤在散筆句句立身題外古人畫龍必於支股斷處烘染烟雲
爲不測烟雲奇則鱗甲更奇矣○淵明采菊東籬下悠然見南
山此亦只是尋常眼前實景看他說出甚容易爲甚千古詩人
刻劃不到摹仿不來可知語句之妙不可向語句中踪跡也見
地高胸次灑落下筆自有箇迴絕處若只於前評用工夫不曉
得向上一節也是枉然

思之尖能深入人曲折所不到處使其中更有一層留餘便不見
其深筆之超又能高出人識想所不著處使其上更有一點芥
蒂便不見其高兩者缺其一則深者晦而高者滑矣此種文真
可爲浮淺膩鈍人却病上藥

凡題多穢膩軟熟之調者得高峭雋逸最難今人卽講古也只在

唐宋以下不能問之秦漢前故其筆力愈蔓穢也

文字首辨雅俗讀其文夷猶瀟灑如置太白於殿廷作宮中行樂
艷調而本色高致自在此之謂真雅若是俗骨雖理解不謬格
局如法而俗不可醫卽不可以言文○俗有出於文氣者有出
於理體者墨裁之俗如乞兒登門喝采作吉祥富貴語油腔之
俗如弋陽村劇場上場下同聲此俗之出於文氣者也至未嘗
講究義理而妄論書旨是非未嘗稍習古人行文之法而侈談
先輩法度止靠講章一本自以爲學問盡於此此俗之出於理
體者也然文氣之俗不過希世速售彼亦心知其鄙故稍有志
識卽能變改若理體之俗則其占地高而執說近乎正更卒不
可破此一種俗人猶難識辨故自以講章爲文不特理體壞文
氣亦壞此不可不首辨也

無時文蒙氣。無講章腐氣。清淺中自饒雋姿名理。此爲真色。當行強加巴攬。差排。便俗態百出矣。

老手行文。如書畫大家晚年製作。俱從極奇橫秀。濶工緻中來。故淺淺疎疎。數筆。令人玩之。有不盡之意。卽文家所謂絢爛之極。乃造平淡也。

用意越濃。出手越淡。用力越重。出手越輕。用筋節越老辣。出手越秀嫩。此是作家純熟脫化時。自有此種境界。強迫取之。不得也。文之貴賤。分於骨氣。不可於形模求也。近人輒以夸大之語。重滯之調。粗俗之論。充之。此乞兒贅富貴。非當身富貴者也。骨氣之賤。至此爲極。看先輩文。止是本色風流。自然高朗秀逸。是爲真貴。然則骨氣賤者。何以救之也。無他法。只是多讀古。不急求必得之道。如此。則心正。心正。則氣骨亦轉矣。

或疑小講不是點上文處曰此論亦坐看煞了時俗格式小講點
上文直起此法最古後來用虛籠數語爲小講而後入題此爲
近古法若小講說完全題而入題又從新說起乃時下俗法也
反執俗法以譏古法不亦謬乎若小講單冒全題不承上文還
可點清小講承矣落題又承不但逐節畫斷無此文氣所謂頭
上安頭并無此格式則又以亂竄無法之法譏最古有法之法
不更謬乎

古人雖極變化中題界未有不清者不清則無法矣

唐德亮參乎章文云云一貫有一貫正義忠恕有忠恕正義兩

下各自著實而關會處了然此是先輩最高本事固不用偷腔
換氣亦無暇掉弄開幌子也自論文者鄙依註說理爲學究氣
訓詁氣以不著色相不落言詮爲高於是學者日與理遠凡遇

理題必避正面而尋旁枝異徑。如此章但取授受公案與言語同異機鋒。所謂一貫忠恕則概置不講。非不講也。向來厭棄若浼。不知其說云何。雖欲講而不能也。一變而強爲之講。則又不得不不出於學究訓詁膚鄙之塗。以爲遵註。嗚呼。豈復有書理註義哉。此文亦犯前病。然其文特高。有客論近來滑調空行之弊。實始於唐君。曰。不然。唐之空滑。猶本於古文。後來之空滑。本於講章。此不可同年而語。自古文者。猶有思致奇趣。但少實理耳。若講章一派。則惟有爛惡而已矣。正如吏部論出身。一爲科甲。一爲雜流。其高卑貴賤固迥殊也。但講章之爛惡。粗事古學者。卽知其非。其以古文爲空滑者。到說道理處。無可支架。必借佛經語錄之套。以自名高老。以爲古人之旁通橫溢。無所不妙。而不知其爛惡與講章同也。此又如科甲與雜流到溺職削籍。

則一而已矣。此一弊每足以誤高明。故特爲拈出。

俞樾云云。卑庸之文不足深辨。稍有才識。讀古者皆能心知其非。但牽於揣摩之說。不卽棄置耳。若此種文。其見地與手筆頗高。非卑庸之所敢望也。故有才識讀古者易惑之。不知雖有高下之別。而其爲魔而不當理均也。故特舉以爲辨。○魔解始於正嘉之後。若魔調則自萬曆中始。亦有高下二種。下者出於講章小說。湯暉菴之類是也。高者出於佛經語錄。楊復所之類是也。至啟禎之間。又有以莊列史漢大家古文而運用佛經語錄。如金正希陳大士皆不免於此。其品愈高。其魔愈深。此文乃其流裔也。真學古者於此更當高著眼孔。

先民精於理學。每自有發明。不由訓詁。却正得傳註之妙。自嘉隆以後。邪說浸灌。叛道反攻。若有發明。必悖程朱。又不加墨守之

爲愈。近時名爲遵註。實不明註義。但聲喚幾箇註中字樣。便自以爲得法作家。此不特爲邪說所鄙笑。并訓詁老學究亦慨誦其不通矣。將來窮則必變。此一羣朽胸捷舌之徒。豈能出二氏之手。其必折而入於邪說可知。有心斯道者。其憂畏當何如也。

陸燦子使漆雕章文云云。其見處煞高。然有過高到那邊處。反見粗疎。也是得會點分數多。得漆雕開分數少。學者不見此等文字。眼孔低。境界淺。終久沒智力。正不得以粗疎失之。文無他奇。止要見得分明。則一切蒙籠纏繞。皆用不著。其文必潔淨。潔淨則轉折出落皆自由自在。故便利便利則發必中的。而所擇愈簡而愈精。斯爲老到。老到則高矣。

朱子之文章云云。此文迴絕衆人處。不在解題破。不在局法古。不在機神敏快。只是說道理到十分平實。是十分高妙。

彼在解題局法機神講究。與淺之乎言文也。此非精於經學理學。固不能窺其藩籬。亦信不及他好處。

老手作文無他奇。隨他襲求人時。只是骨性不改耳。看其受貼處。自有空盤排界之氣。

文之瓌璋踴厲。不可一世者。難其肖像處。使鬚眉生動耳。若不著題目痛痒者。雖奇麗。吾無取也。

文章稱情得體處。卽是正大莊嚴。作家高人在此。諺所謂有理不賄聲高也。

奇秀在濶遠中來。濶遠又在超脫中來。令人久讀而意境常新。此所謂自然靈氣。

凡爲大言者。其中無可大而假於言以大之。吾正薄其不能大也。按之有骨。咀之有味。又何歉乎大言。

康體謙文云云**評**端謹密栗。北宗之長技也。脫灑變幻。南宗之長技也。今南方皆趨平熟。如此奇肆之作。乃得之秦中。朱子譏老莊家精微盡爲釋氏所竊。却去做他經教之屬。譬之巨室子弟。珍寶爲人盜盡。却去收拾他家破釜破甕。正復相類也。

如早朝應制諸詩。取冠冕臺閣。亦未爲不佳。然也須切題著色。語語典雅。自見風神。後來徒以乞僧喝采之鄙聲。亦自附於冠冕臺閣。則又當頌冤矣。

古文中能縮大爲小。第一算公穀。以短節促拍爲排蕩縹渺之勢。令人讀之不覺其短促。此公穀之妙也。今人以刻仄尖纖爲公穀。失之遠矣。

鄭梁文云云**仇滄柱**鄭子學本程朱。詩宗晉魏。作古文以方正學王文成爲法。獨於八股自謂不必用心。噫。鄭子以無意成交。而

我以有意質之。理學之人必能虛受。諒不予憾也。國有德者必有言。若更用力於詩古文。則言中工夫又加詳矣。八股不過體格異耳。道理文法豈有異乎。言爲心聲。書爲心畫。古人於嘖笑舉止。足以窺人底裏。况經營成章之言乎。厭薄語言文字。無如王伯安。然伯安所作八股。理法亦未嘗不謹嚴也。程子寫字甚敬。云卽此是學。故謂八股不必作。則可謂八股不必用心。卽此語便不是學。則其所爲程朱晉魏方王者皆屬可議矣。此雖一時應付之語。然學者不可爲訓。

文章虛妙處皆生於實。彼不能實者不能虛也。

以實爲虛而筆情高妙。令人摸頭不著。如雨中觀龍挂。蜿蜒分明。却不見其出沒起滅所在。此種變化不向漆園家裏過來。亦無從擬議。

持正稱韓文凌紙怪發鯨鏗春麗然而栗密窮渺章妥句適文具
此氣象甚難要不可不存斯意鈍根穢業妄思坐致榮膺宋人
詩云從來剽竊爲場屋直是無由識古書加指罕能官顯達到
頭剩得腹空虛真堪愧悔死矣

舊人行文大約前以輕淺引入其力量俱留在中後令人愈入愈
驚其難盡今人所有在起手數行已和盤傾倒以後不是游演
了却便說了又說或另生枝節皆不識養局法也

凡於邊縫花草間牽纏見長定於正面脫略縱極奇快也只是空
疎沒力量文字題中實義止苦發泄不盡何暇作交互繚戾閑
文耶

文所貴者爽氣朝來玲瓏窗戶無纖塵之翳外間令含糊不痛
不癢美其名曰渾融不露我道是不曾明白說不出耳

文字有學者氣。有大人名士氣。有和尚氣。有村教書氣。有市井氣。時下最是市井氣多。其典型則村教書而已。惟學者氣絕少。胸無意義。視題便有多寡虛實之迹。磊墜紉布。力已盡於支配。安得更有佳勝哉。作家隊伍精工。只是理足。自有天然之巧。說理的確。難矣。的確而出之以超逸灑脫流動。則尤難。到此方是自得。故凡自以爲的確。而驅而納之村學鄙說之中。而不知出者。其所爲的確。乃大不的確者也。

於語言字句之外。別有一種風神纏綿兜裹之。在畫家謂之氣韻。診脈謂之胃氣。地理謂之生氣。皆是物也。文家得之爲文情。此不可以迹象求者。

文字到真腔的板。無處著一分花假偷換。若不從經學理學實講。究一番來也。無處討他消息。正如禪家語句。雲門曹洞。外間看。

來尋常作家間之下拜。

文以靜氣爲至貴。而時論每以俗文之卑弱無氣者當之。不知靜出於雅。正與俗反。靜文必矜卓。正與卑反。靜則骨勝於肉。正與弱反也。從此推之。可以得靜之真。

文字到賭眞實本事。便無絲毫躲閃。那移處。不但隔壁寬皮。近池不得。便依經傍母。是副身。不是正身也。都近他不得。其餘論終局。論出落。論氣體。論機神。皆不消論得。蓋理眞實。則無所不備矣。

評文者動曰渾融。曰圓密。曰閒靜。曰韶秀。此數者。固古人文字中至高至美之品。然觀評者之所指。則實未會知此數者。是如何而漫以含糊軟熟。不著邊際者當之。不知其非數者。而彼固自有主名也。其名維何。曰只一混字盡之。何以爲混。曰只講調頭。

不論義理。

時文亦有製局如法。氣度清閑者。可惜不會向題目裏面認真道得一句。便恁休去耳。嘗語子弟曰。汝怕題目痛耶。題目整汝手耶。如何遮東掩西。只討得一場沒理會。

評家謂絢爛之極。乃爲平淡。清真之至。乃爲波瀾。含蓄不露。乃爲局度。最善論文矣。顧在今日。先須辨雅俗。不則打油活套。膚衍麻糊。皆可冒附矣。

目空四海。方能開人間未開之境。要其落筆都在空際四旁。故文之不能爲奇。大概犯粘皮帶骨之病。

文境明快直達。郭青螺所謂清空一氣如話者。此本色品骨最高之文。非摹擬脩飾之所及也。

取徑於幽仄之區。游神於沈寥之表。不無過處。然不得與塵土輩

比較短長。

有脫然處。有的然處。有恍然渺然處。文之境界乃逸。

駿瑋之言。其間每不無粗處。要之洪濤中無所不浮。只是脉正氣盛。不礙巨觀耳。

欲破俗士膠粘沉痾之疾。須得雄奇橫肆手段。陳白沙所謂附子大黃天下藥。此處却正用得著也。若更以精醇出之。其妙當復如何。請大家參此一轉。

文章能事要在實地耳。虛神所以助勢而出奇。然無實地。則虛神亦無所附。

世所稱端凝閎達。只在詞調上煉成。吾所喜者。其理正而氣靜。自然端凝閎達耳。

時下文字。局法非不安詳。機調非不圓利。神韻非不渾融。然只欠

一切字。故乍讀之甚佳。細按之多不著實。是以先輩文字。本領只在意理。若單講局法。機調神韻。而不講意理。便成假合。

切題在意義。不在字樣。意義確切。則字樣露與不露俱佳。今不講意義而止論字樣。則主分貼者。不過以吟噉了事。主渾發者。不過以含糊混過。使作文者顛倒於選家無定之說。曾何當於題理乎。

迺麗中筋節挺露。此之謂華秀。華秀在骨不在肉也。若不論骨法。則市井癡肥漢。皆可作虎頭燕頤觀矣。

先輩論文貴平實。平非庸也。而况可以俗當之乎。實非肥也。而况可以醜當之乎。按脉中理。不少不多。不浮不沉。斯平實之正則耳。

文之峭崛者。必少雄浩之概。其疎濶者。又必無堅鍊之音。此唐以

後名家所不能兼也。

艾千子善講拙樸之妙。拙樸者奇巧之極。近人所不曾夢見也。然有平實之拙樸。有渾浩之拙樸。有幽峭之拙樸。

喬中觀既庶矣。又云云。謂氣局甚冠冕宏正。按之却不耐咀

嚼。以其詞多義少也。如何是義多於詞。只是意切。此文亦無題外溢語。如何不切。吾所謂切者。非門面貼合之謂。如富之必從庶講出。教之必從富講出。庶何以必須富。富何以必須教。庶難富亦易富。富難教亦易教。富庶合如何。教富合如何。此中甚有精理。能洗發便是意切。只浮面鋪陳。縱極貼合。與題中精理膜隔。不可謂之切也。

今日人品文品。其病都欠一恥字。就時文言之。目不識經學理學。爲何語。目不識周秦漢唐宋爲何書。而居然講義論文。牧猪奴

賣菜傭皆可稱名宿矣。至活套之調熟爛之詞爭填鬪抄。若以不雷同爲恨。互相稱歎。至下極汚久而不厭。昔者套川別題文句亦必稍更變而出之。今則公然對題通篇直書。且刻且行。恬不爲恥。皆可怪可歎。嗚呼。行文有恥亦可謂士矣。

欲學古人。勿求形似。須先得其氣。欲得其氣。須先開膽力。膽力何由開。只是看得道理明白。坦然無疑。橫衝直撞。無所不可。隨地觸發議論。不論金銀銅錫。都可開點寶丹。則膽力足而氣沛然矣。但區區補幾句古文。麻布夾紵絲。死口取活氣。何處討此景象來。

劉須溪謂唐人文字皆界定格。段做。所以死。惟退之一片做。所以活。此亦文中關捩子也。

古人謂子由文界畫定。做却不好。子瞻不界畫。一滾說去。却好。惜

此關捩提筆直書。屈橫注海。純以一片神行。真有篇如股。股如句之奇。

作家反正淺深開合之法。亦與世無殊。只是世間所講實義。都是假竊名貌。最上不過尋得伴當副車。惟真作家擒拿盡是正身耳。此間相去却甚遠。

凡詞多而理少。則浮。語重而氣俗。則穢。皆肉勝之害也。若理真則但覺其詞之高貴。氣雅則但覺其語之端凝。肉卽是骨。又何骨肉之可分乎。

文章雋永之妙。止在言中。而言外之味。翫之不盡。亦無他奇。只是曲折影托處。令我所欲言者。隱躍透露。四而盡出耳。須知此是說意理。不是說文法。

凡說大話過火。便於理不切。文未嘗不端練。按之皆膚套矣。

自首訖尾。如題挨講。而肢節斷續。一氣溶化。天矯蜿蜒。不可尋其
段界。此種神境。須火候到此。自會。不易臨仿。然須時存此氣象
於胸中。雖凡胎亦能超詣。若錮於村講章之派。拘於假先輩之
形。視此種如仇敵。如天神。不敢稍近。則曠劫墮落矣。

或謂兩截題。總提起。非古法。曰。古有何法。法何必古。只在當理耳。
先總提。下面側分。亦有何害。但中後總做。則不如截做爲得。蓋
總做未免說了。又說。多叠床合掌之病耳。若總做而不犯此病。
又何害。

如事君敬其事。而後其食。題論格。則截做正也。分做亦正之次也。
分對之中。仍不失輕重賓主。與上下聯貫。一氣之法。又其巧也。
而下語用意。皆有精義。不作寬套大帽頭。則又在論格之上。

凡小講下。卽直點全題者。必欲自出議論。不便循題中次第。而然。

若既隨題挨講矣。則斷無直點在前之法。蓋後面挨講諸比。卽是此一句。若點在前。則後皆複剩矣。

文章中名貴二字最難承當。爲其不可以貌爲也。於體格法度不細密。則雖高亦爲疎脫。若過於細密。則又入卑俗。無光華。則爲枯澀。著意於光華。則又失之膚。此皆名貴之所反也。必湛深古學。又精於時文之法。淘洗錘鍊。皮毛落盡。乃見真相耳。

極散題偏做得極方。多寡無痕。輕重悉敵。若此題非此格不可者。此局法生於意理也。方在意理。不在局法。方在局法。則爲割裂。方在意理。則爲變化。

文無靈快奔逸之氣。縱極脩飾冠冕。如子陽鸞旗。旄騎。陞衛警蹕。總是偶人形耳。

今人未嘗不遵傳註論先輩。然理則講章之理。法則學究之法。調

則枵乞之調豈可以此爲傳註先輩哉言之無文行之不遠古
文時文皆文也今之腔板謂之俗可耳亦名曰文豈不可恥故
當先辨雅俗而後問其密疎美惡

文有說盡之妙有不說盡之妙不說盡却不是含糊遮掩者得而
假冒須有許多意思道理擁到言下却不消費力只以淡遠之
筆舉其大意令人隱約盡見此謂不說盡之妙

至變者文至不可變者理格調者文之變也俗法每以爲斷然不
可移如喜怒哀樂之未發節言性情自然之德不根戒懼慎獨
是一定不可變之理選家見不根者則云不根上遵註妙見根
來說者則云根上本艾東鄉說妙嗚呼艾孝廉何人也乃可與
程朱兩存其說而無一是乎理不可變者任之變文可變者禁
之變直謂今之選家文理俱不懂可也

言言卷一
文有短小精悍。又復渾浩踔厲。此不在尺幅論廣狹者也。彼以委怯爲和平。迂繞爲春容。束縮無生意。枯澀無議論。爲收斂者。其不翅池蛙之擬法部。

文無適宕迤演之氣。因瑣會。皆行尸坐魄耳。未嘗以嘔驚駕奇。自然排闥驚羣。得此。

以理學爲經。以經學爲緯。以古文之學爲組織。此昔人所謂錦機也。

人於鳶飛戾天等題。最怕實講道理。曰腐。曰執著。故寧取空滑一路。不知實講則雋快。安得腐。實講則通明高脫。安得執著。彼空滑者。未能腐與執著者也。腐與執著者。未能實講者也。總之不會讀書講學。而欲猝乍到此也。大難。

所取乎變格者。貴其凌空出奇。而更能發明體要也。於題義無得。

而徒求異於章法掀翻之淺者抑變格之末已但以破墨腔鄙說則可。

瞻麗之文每不耐久者中無有也以實義爲體以古調爲用斯光彩常新矣。

典瞻是易典確則難時文不論何題隨手填湊無他只緣空疎寬泛耳若語語有來歷不混借自然高華典貴。

只川淺深反覆之法而意變幻令人應接不窮此是自描中最高手。渾身是筋骨不可似皮毛仿之也。

朱子謂李盱江文字皆從大處起議論蕭眉山家皆從小處起議論此指發端言耳。惟大小具備斯縱橫莫當若有小無大則叙次雖極錯落終屬小家有大無小則平點必忽略無味矣。

前輩論文謂神理亘古常新字句脫口成故今以枯管枵腹襲取

套詞若村學童描硃老弋陽度曲淺陋雷同令人嘔吐若能發揮名理而以古文氣骨行之神奇滅沒莫知端倪今靡靡者欲襲而不可襲豈非絕代一快哉。

體格脉縫之精密猶是時文家所能若下語字字落儒者窠槽如江都武侯宣公論事便有理學氣象須曾實下講究來非熟爛本頭之所有也。

康體謙凡爲天下節文云云。短文能手多用曲此偏用直多用單句此偏用疊句多用玲瓏簡貴此偏用縱橫排疊所云芥納須彌梯藏巨海極短文之奇變矣。○短文講大意必撇過本文若挨講本文則不及大議論此篇前後議論雄放以發大意中幅以古筆點次本文而仍不滿三百言可知俗所謂短文原非法嚴只坐才窘耳。○重疊復巘直以大氣舉之胸中若有一點

要短之意。卽不能奇橫至此。

今文萎繭如六朝子弟。無不薰衣剃面。傅粉塗脂。無一鬚眉男子。安得衣冠劍佩。顧盼熠如。一洗巾幘不揚之氣。

文氣壯潤。若涉河海。一時難測其吞洩之所在。人以爲蘇氏父子。非也。直從漢人得來。時文中有此。實是奇觀。學人卽未能爲。亦須見得。放令肚皮開潤。

畫家最貴者氣韻之秀潤。而最惡者曰甜。甜者亦自以爲秀潤。而不知其實俗也。兩者相似而極相遠。何以辨之。畫之秀在神骨。而不在布設烘染。文之秀在思理氣脉。而不在聲調句字。凡在布設烘染聲調句字中求秀。卽未有不落甜俗者也。

說道理直到滴滴落銅錢眼孔裏。無他也。只是熟耳。如何是熟理。實到極處。心細到極處。氣靜到極處。

刻斲之文難於爽拔意論多而絕無支離悶澀之病只是理足自達耳。

文無定體體隨義立只要明得定體之所以然則不定更佳。用經學最難而用易尤難非淺腐卽穿鑿耳。因謂易不可用之時文此所謂不善操舟嫌港曲不善作書嫌筆秃也。

題目大樣文固須得體然所謂大樣得體有根本有大義有典則故曰宰相須用讀書人亦爲讀書則見識經術不同若不會讀書而妄求大樣不過市井之夸談吏胥之尊奉而已徒見其寒乞安得大樣。

凡自命古學者多失之粗疎而專精理法者則又成講說俚鄙之習兩家分據門戶畸互勝負以爲救而文章之道盡矣不知其所謂古學與理法皆從假襲故各不相通耳不相通便非真理。

真古也。但真讀書人。則兩者自一。

凡題苦多。廓落語者。一著鋪陳。徒增穢俗。或者避而入於架虛寒陋。又於題之本體。不相得。正如王李鍾譚之論詩。爭取舍於濃淡。其不知識同耳。嘗見錢虞山謂臺閣詩。近世惟李西涯得體。吾見西涯詩。只是真雅。真雅便自然莊嚴華貴。論文亦當得此意。

文到說得震動精微。或詫以爲粗。非也。粗文不刻入。刻入那得粗。驚人者。只是氣之熱悍耳。然熱悍過火。處自有語病。亦須分別觀之。

看清義解。橫衝直撞。不問金銀銅鐵。信手拈來。鎔成一器。是甚樣氣魄。若無此本領。便精良至寶。都爲爐邊查礦耳。故求氣魄者。必於義解。

熊伯龍文自記

文極透快而一時名士以我爲腐曰直之難如此

評大約名士先不識字義如所云腐者訓熟爛也空朽也臭惡也然則今日名士之文乃真腐耳若實學至理如終古此日月而光景嘗新正與腐字相反故凡以理學爲腐皆不讀書不識字名士之言。

凌虛之技妙只在鬆鬆則層次不竭而變幻自生卽本地風光亦運用有餘矣然須要意思多乃有生發不則鬆處皆成空殼引述語可前後用引者大旨而中述其詞或尚有下文則止在前半用斷或前後俱未盡則於起講略斷一二語引入或轉側碍手索性用斷亦有之乃有聖賢自言而半斷半順忽斷忽順者又近來異事也。

文字中靈境極難得以其必從實地開出也名山勝地終古登臨

而奇變如一日。以其實也。桃源醉鄉。只好紙上恍惚耳。何靈之有。

愈切實。本領愈大。故文之大小。視乎理。不在詞調恢弘也。

論遷葬禮下一句文云云。評根上文。單通章。講此題針線盡之矣。

抑未也。其爲根爲單。俱要從議論發越。乃佳。有議論矣。抑未也。有讀書人議論。有市井吏胥議論。故有指陳利弊。講究情事。大段亦不甚遠。然出之讀書人者。便有體識。有原本。有氣量。其規模精意之所至。自是不同。故曰宰相須用讀書人。非沾沾記得一文錢。上年號源流。遂足當讀書人三字也。不然。禮下民制。只消幾箇吏禮戶部當該。火房足辦矣。近來議論極曉暢者。每不脫市井吏胥氣。如此文。可見讀書臭味。

近日論文者。好言正大昌明。及觀其所指。則極卑汚鄙醜之文耳。

其訣不論題理不用意思止揀無破綻吉祥詞語運之以圓熟
寬套之句調如乞兒叫門喝采者然乃所謂正大昌明也示以
名理高昌一種不知反目何名矣

換題實講層層有新警之思與章旨上下節脉相經緯股法不合
掌句法字法不油衍不虛枵章法奇偶相生參伍彌縫如魚龍
此種是王震澤直下法嗣

文人心思正當在人所不用處用出奇勝來爲妙耳如何今人論
文都要驅入腐爛無用之死地去

敷綴者多驕駁解脫者逃空荒肯用深思古力爲鉤勒而虛實皆
至固當求之讀書人耳

作文不在詞費只要見識高人

文字得情不得情與生死真僞只在著眼落脉處鬆不得一分

局不嫌奇。要看理透不透耳。

文有全題。竟不見踪影。不但格局。并句字註解。俱不見踪影。然却無一語不從題之骨髓出來者。若拘定格局論文。則有才思人。斷無開口處。必欲其同腐爛於幾箇惡套醜調中。而後已耶。

今人好言醇雅。不知二字極難承當。醇之反爲偏僻。所知也。而不知膚鄙之非醇。雅之反爲粗悍。所知也。而不知淺滑之非雅。

近人最不解作小講之法。大都開口說盡。已是一篇小文字。後邊反成贅複。其餘或入首太隔遠。或別生枝節。亦總無是處。此皆近時邨教書俗選手。不識法度。蒙童開筆便錯。壞却多少好資質。可歎也。

嘗謂昔日秀才難做。近日試易。當日極陋劣秀才。巾箱中亦須抄經子古文摘段類語一本。史學則王鳳洲再抄蘇紫溪諸理齋

鑑一部。學者猶鄙笑之。今都不消得矣。可歎也。

今日之文。謂之描文。仿文。奏文。填文。俱可。謂之倣文。則不可。向謂描仿奏填之文。必是易爲。故信從者衆。比見此曹爲之。亦復不易。蚓竅蠅鳴。聲悲思苦。竟有不能成者。則原未嘗畏難也。爲人所愚耳。

理題無油口閑文。亦無努筋刻骨。得註疏之精。無一點注疏氣。平淡淡說來。如故鄉人道士語。如老成世故人談向來家常事。自然津津有真味。淺學者未許容易到得識得。行文如砍陣。盡銳搗其中堅。其餘只須蹂躪而已。

文須不落窠臼。始得獨出機杼。提挈轉落。皆庸夫意中。以爲不當如此者。而作家以爲必當如此。寒蛟出壑。不可端倪。使扣盤探籥。依樣葫蘆兒讀之。亦當爲破襲之舞。

說理有生辣氣最難。生辣而明白淺易如話尤難。

細實文苦悶澁。高爽文苦疎略。透過此境直是迥絕。

粗雜之中自有精細。如生金出礦不無砂石查滓。然寶光自然流露。蓋真金也。後來揀選精細淘盡粗雜以爲醇粹之業矣。然入煅不得皆鼎汞假物耳。真假何以分。曰實須見過書來真何以不粗雜。曰篤信聖賢之說隨所見之書而講究之。

論格者詳於排場關目矜才者盡於機勢橫流若於題之要害無樸實頭本事則兩者總成死法。然所謂樸實頭本事非呆填膚演幾句詞語之謂也。必於理實有所見信筆直達無須假捏始得。

凡用總提過文固不如先輩直起直落之爲高。然先輩力量在實做要害不在區區死格子上也。不可執此法以論文。

凡文謂之雅鍊圓秀者。以其中有骨而外有韻也。骨在理脉意思韻則玩其用筆著色處。

文章到輕重虛實皆渾化無迹無他。只是理明理明便氣質短文不枯率。只在理足。但講得間架出落便茫茫地。驀過有何意味。

楊昶知者無不四句文云云。兩大比雖是正格。然頓跌曲折之文。虛多實少。對偶中換字同聲。讀次尤特。索然無味矣。此用層次併做法。故節節瓏璫峭倩。或云。如此似題云。知者仁者無不知。無不愛也。當務急親賢之爲急。務否。予笑曰。卽如此亦何害。村學究道聽得先輩有如題挨講一法。便哆口惑亂人。未有了日。我法不然。果是生龍。一任橫行逆走。

呂子評語餘編卷七終

呂子評語餘編卷八

東皐續選內摘錄

長文易虛浮。短文易枯寂。皆理不足也。理足只是道得著。道不著時。千言萬句。看來只如無有。道得著時。數語隻字。自是意味無窮。然須不是偶轉。將數十冊理學書。一一在尺田寸宅中打疊過來方得。

虛題人苦難支架。於是用文外之文。語外之語。如敬大臣也三句題。動云臣卽未言其效。何如事何如。雖其事其效未盡乎此等句。竟如小說演義所云。按下不題。且聽下回分解者。可怪可笑。而相習成風。至今奉爲虛題祕藏法。選家賠贊盲圈。若非此不可者。毒誤後學不小。

與其取油口空拳。偷腔白戰。使白丁皆自命爲鴻儒。寧取當行簡

鍊之文端凝有法。切理鑄詞。不令浮豔得竊其色。笑庶幾學究秀才強飲幾升墨汁耳。

簡鍊之文。須有老氣。法脗珍饈。極芬腴中。貴有姜桂之味。遊人痛恨此種。只喜麀羹油肉。終是屠沽食料耳。

有論仲弓問仁章題文。夫子口中不露仁字。不露敬恕爲妙者。此正學究強作圓通派頭。萬曆末年講章論文大都如此。爲背畔傳註之由。不可不戒也。此章論箇恁麼仁字。如何要隱。只是要說爲仁。不可說竟是仁耳。敬恕是鐵板註脚。如何要諱。若云題中無敬恕字樣。然則存心推心等語。又豈題中字樣乎。敬恕乃解白文。存推又解敬恕。尊講章而諱本註。豈講章字面反可入夫子口中乎。執此論文。將使天下視註語若鬼怪。必欲盡泯滅而後已。其害可勝言耶。總之解題貴乎切理。切理在乎體註。有

通篇吟喝敬恕而全不得敬恕之理者只算不會做敬恕有通篇不必露敬恕而其理湛足真是做敬恕文之妙正在切理體註而氣韻生動不在字樣之露與不露也

圓密之文貴乎切理如綿裏鍼須有鍼在外間所作圓密乃狐狸拜月戴鸚鵡樓耳嫵媚即得謂有人氣即非

書家公案曰畫沙曰印泥曰屋漏痕正是要藏鋒耳藏鋒便有鋒在。非癡肥墨猪也。論文亦須得其錘鍊筋節處。

清異之文必精于煅煉方有神味。但用空纏便不堪尋玩。須令人上口爽脆。久咀益鮮。而無糟魄之可厭。乃爲佳耳。

文最忌熟。熟則必俗。故士龍怵他人之我先。退之惟陳言之務去。習之以爲造言之大端。卽書畫家亦惡熟俗。以熟裏生爲訣。正謂此也。今人爲文。惟恐一字一句不熟到十分。萬首雷同。如一

父之子尚得謂之文乎。

文章著色不在堆垛隊仗。但骨氣高貴。雖淡淡烘染。自覺陸離。彼以豐肌縛肉爲色者。真穢相也。骨氣如何。只在法律簡鍊處看。布置全局。筆筆老到。自然高貴矣。

短文煅煉。如丹家銀母。一刀圭可開點千萬。乃是耳。又如作畫。尺山寸樹。須通身縮小。若于中忽作徑寸人物。便不成畫矣。

先輩謂文字。大段卓越。句字不足介意。如神王者。疥癰豈能爲害。若彫削之人。雖五官肌膚無恙。然長桑君望而却走矣。故文不必無累句。而氣局純乎古文。見識便自闊大。正不許皮相家向牝牡驪黃撻索也。

法脈出落不可不講。然無蒼秀氣骨。而著意于此。以爲老鍊。其老鍊處。正是惡俗處也。名家不衫不履。清機相引。而段落鍼線妙。

入無痕。大呆子從何處覓生活。乃悟斜插簪。解散髻。非王謝家固不須捉此耳。

文貴有真氣。真則行文必簡樸。用意必刻深。遣詞必淡雅。此先輩之所以可貴也。

一題衆拈。變格勢所必至。變而仍當於理法。正見文人弄奇妙境無窮處。但自走難路耳。如不當於理法。雖正格無益也。

短文貴長勢。在轉換有不窮之氣。短文貴長韻。在蕩折有言外之神。彼枯縮以爲短者。非能短者也。

短文無變換。則窘于邊幅。無意思。則枯索無老峭之致。則稚于初試。筆僅免曳白耳。

文貴鍊粗以爲精。非省多以爲少也。

文有使人一望而知其爲老手者。其開架方圓猶夫人也。句語虛

實亦猶夫人也。但言不妄發。必中要害。莊周所謂犁然有當于人心者。此却大難。須火候到此乃得。

有蒼老之骨。而後能爲輕快之文。無本領而依口學舌。徒見其淺劣。白撰而已。白傅詩老嫗能解處。却是作家不到處。他是如何用工來。

慙書內摘錄

冊子上言語。紐捏已攬來說。終是不似。朱子云。須是爛泥將熟。縱橫妙用。皆由自家。方濟得事。老蘇平生因閒升裏轉斗裏量之語。遂悟作文妙處。所爭在熟不熟也。

其妙。心知口難傳。策杖無道路。直帶意所便。又行至孤山西。夜色已蒼蒼。清吟雜夢寐。得句旋已忘。尚記梨花村。依依聞暗香。

西湖東坡一時在目也。下筆灑然。

各本序例附錄內摘錄

洪永之文質樸簡重。氣象淵遠。有不欲求工之意。此大圭清瑟也。成弘正三朝。猶漢之建元。元封。唐之天寶。元和。宋之元祐。元豐。茂以加矣。嘉靖當盛極之時。瑰奇浩演。氣越出而不窮。然識者憂其難繼。隆慶辛未。復見弘正風規。至今稱之。文體之壞。其在萬曆乎。丁丑以前。猶屬雅製。庚辰。令始限字。而氣格萎蕸。癸未。開軟媚之端。變徵已見。己丑。得陶菴中流一砥。而江河已下。不能留也。至于壬辰。格用斷制。調用挑翻。凌駕攻劫。意見龐遲。矩矱先去矣。再變而乙未。則杜撰惡俗之調。影響之理。剔弄之法。曰同熟。曰機鋒。皆自古文文章之所無。村豎學究。喜其淺陋。不必讀書稽古。遂傳爲時文正宗。自此至天啓壬戌。咸以此得元魁。

展轉爛惡。勢無復之。於是甲乙之間。繼以偽子。偽經。鬼怪百出。令人作惡。崇禎朝加意振刷。辛未甲戌丁丑。崇雅黜俗。始以秦漢唐宋之文。發明經術。理雖未醇。文實近古。庚辰癸未。忽流爲浮豔。而變亂不可爲矣。此三百年升降之大略也。東阜遺選前集附錄
一省一科之風氣。定於主司。天下數科之風氣。定于選手。通闕弊無合作。不得不因陋就簡。此主司之予奪兼數命者也。聚遠近先後而論斷之。引繩削墨。是非灼然。此選手之予奪專於理者也。故選手不與主司較遇合而後足。以論文。昔之選手。大都如是。故其書至今可以惠後學。今之選手。本領庸劣。其腹之空疎。手之甜俗。更甚于學究秀才。助彼說而張其筏。昔之選手能轉天下。今之選手爲天下轉。故曰。今之選手。今之秀才之罪人也。

吳次尾譏萬曆末年士自本科十八房而外不知宇宙尚有何書。前此作者尚有何人。實學之衰極重難挽。近時習尚正復如此。己丑壬辰一返蔓縛而歸之醇正。多老學好古之士。故格力道上。乙未以來名曰模範。先民實趨空疎甜俗。其所見之理。所宗之法。不能出萬曆乙未之圓熟機鋒。況能闢嘉隆以上之籬落乎。戊戌己亥辛丑。雅鄭互見。未嘗無矯傑之作。而外間盛行。偏取下流。不知佳文幾何。盡爲俗眼所埋沒矣。

次尾標摘當時俚俗字句爲文禁。且曰此等惡習始於一二空疎之子。以僥倖取捷。後人無學無識。轉相套襲。日增月盛。今之惡習尤甚矣。目不識經史爲何物。而欲鍊飾詞彩。不得不出於俗談。誣謬臭穢不堪。有人悟近日一名稿。全部只三百字可了。以爲祕妙。蛆蚋甘帶。鴟鼠嗜糞。良不虛也。

癸丑夏余尋宋以後書於金陵得借抄黃氏千頃齋周氏遙連堂藏本數十種又與諸友倡和飲酒樂甚留秦淮再閱月攜昔友陸雯若墨選鬻於市市人謂風氣乍旋此書如颶激也余不知風氣爲何物旋不旋行不行何預人事見坊本有誦羣選劣狀者快喜披終卷則故是向聲適自誦耳又爲之索然或曰彼固皆知文而以選爲業方將以其書購賈聘煽童蒙津干謁釣優等高第贊帳幙梯媒饜宮室妻妾子女臧獲之欲其關切如此得失交患顧瞻皇惑雖心知其非不能不順時也公殆無意此數者蓋正諸余又烏乎正人心之汙下也久矣士不力學中無所主而丐活於外惟知溫飽聲勢爲志凡余以爲理也文也被且以爲利也名也而又烏乎正雖然公刻陸君書旣續之矣今增是集不更使陸選流通乎余感其言因合諸名本刪之其點

次得若干首以附今集後雖與外論不同然典型虎賁敗露黃
余其間苟取充塞可訴亦復不少嗚呼雖甚盛又豈吾事哉

續選附
錄下同

文體之敝也由選手而選手之敝也由蒙師時文法度之最淺近
者如破承之貴切而高渾也小講之虛涵而勿盡也提挈之得
脈而勿痕迹也提比之籠籠而勿急也小比之點次老鍊也中
股之開合切實也後股之推廓而不餒不泛也過文之宜反宜
正緩急合度也結比之有餘勇也掉尾之力勁而有別趣也一
句之當拆發也全章之剪裁有要也連斷詳略之不可混也立
柱分股之不可合掌也布局命意之不可複疊也此宜童子試
筆時講明久矣而今之巨公皆犯之選家賞歎之則豈非蒙師
罪哉昔者盛時吳中大家嚴重師坐皆不惜厚幣豐養致敬盡

禮以聘名宿爲師者亦自珍貴以副其責今皆不然欄中之牛
撫有數金館穀若項王弄印剗敝視善承吾意者與之亦如其
僱工然不患其無有也爲師者因各營狗監以求進旣得之則
嬰媚順旨諂事弟子彌縫及乎僮僕以是爲固館之術然且有
攫而擠之者其價日以賤其品業日以卑其人日以衆或戲謂
二千五百人爲師其徒數十人非徒少而師多蓋無人不可爲
師也師旣如是見文之奇博有本者惜不能句讀音釋講解則
必力求空疎活套之書以爲業使其徒速成而已可免詭於是
乎空疎活套之選家得哆然餬口於其間亦無人不可爲選手
也選生師師生選文體遂極弊而不可返今縱不能驟還於古
願臯比論文者取淺近法度其講明之其爲文也亦必取資於
六經左國莊騷史漢唐宋作者如程長齊之分年日程趙考古

之學。範成法具在。可仿而行也。余嘗謂五方言語。謠唱百里殊風。無一同者。獨乞兒爹娘之聲。普天下無二。今文萬喙雷同。猶此聲耳。士龍怵他人之我先。退之惟陳言之務去。苟力行之。有作者起。必來取法。是爲作者師也。

自開闢至今。茲其爲文。不知凡幾何變也。自今茲至。不可億算。其爲文。又不知凡幾何變也。有腐儒焉。欲起而一之。必有腐儒焉。起而爭之。又必有腐儒焉。起而調劑之。夫其一之爭之。調劑之。是皆爲變所驅。而不能用變者也。善用變者。有可變。有不可變。予天下以可變。而奪之以不可變。可變者。文。不可變者。理。今天烟波雲氣。斯天下之至奇。且幻者也。然求烟波於汚池。觀雲氣于赤鹵。其爲奇與幻者。無有也。故觀雲氣者。必嶽麓。求烟波者。必江湖。夫江湖嶽麓。自開闢至。不可億算。猶故物也。而天下且

以爲荒忽怪異莫奇且幻於此此非烟波雲氣之力哉然烟波不能自爲起滅而雲氣不能自爲卷舒則皆江湖嶽麓之自爲奇幻而已烟波雲氣可變而嶽麓江湖必不可變文之有理則猶江湖嶽麓其有文則烟波雲氣也以至變之文傳不變之理雖開闢至不可億算其爲文無不可定況數科乎哉顧文運之變每視文理之勝負爲盛衰理勝于文則極治平則盛文勝則衰純乎文則亂自治而盛也文運長自衰而亂也文運促成弘以上制科之文理勝之文也嘉隆之間文與理平之文也萬曆以至啓禎則文勝與純乎文之文也其變也如四時然寒而燠肅而和風馳而電掣卽吾操筆落紙時已迅逝而不可留蓋無瞬息不變也乃自開闢至不可億算其爲春秋者如是其爲冬夏者如是然則非變也復也復所以爲變也是以歲之冬也必

復而爲春。必不復而爲秋。爲夏可知也。則文運之亂。必復而爲治。必不復而爲衰。爲盛可知也。天下曰文已復古。然而非復也。變也。何則。今所復者。當成弘之前。而不當慶曆之于也。朱子曰。高祖文帝詔令。只三數句。真觀開元都無文章。嘉祐以前。其文極拙。而詞氣謹重。有欲工而不能之意。嗚呼。此真文運之極治哉。今之復古者。有是乎。故曰非復也。然淳者變而爲清。譎者變而爲正。荒怪者變而爲醇雅。震震然知文之必本於理。始將以開文運之復乎。由此推之。使孔曾思孟以及周程張朱之書。燦然復明于天下。如二儀五緯。經天羅次而不息。庶幾猶及見成弘以上歟。乃一之爭之。調劑之者。方且習訓詁之說。實空虛浮滑之調。謂若者守溪。若者震川。若者昆湖。荆川。思泉。嗚呼。使數君子者在今日。其爲文又不知其何若也。乃舍不可變之理而

刻畫可變之文。是猶去嶽麓離江湖而求所謂烟波雲氣。而且
執繪之雲氣。塑之烟波。謂開闢以至不可億算。凡爲烟波雲氣
者。當如是也。悲夫。是爲腐儒而已矣。五科程

先生語學者。有思辨之文。有記誦之文。二者功夫皆不可少。今人
但解記誦而不知思辨。此文之所以日下也。不知思辨處得力
最多。思辨長。識見記誦長。機神機神所附麗。止于腔調句字。若
識見長。則道理精。法度細。手筆高。議論暢。文品不可限量矣。故
思辨之文。不必句句合度可讀。但就一篇之中。得其高出在何
處。其弊病在何處。研窮剖析。擇善而從。擇不善而改。故雖不佳
之文。皆可以長識見。此卽格物之學。所必當引繩批根。不可使
有毫髮之差者也。至于腔調句字。乃所以觀簞其道理法度。手
筆議論者。固不可不熟。不熟則識見雖高。不能自達。然腔調句

字。因時爲變。在一時中。又有高下異同。各從其所主。但取其有當于已之機神者。讀之極熟。到行文時。自有奔奏運用之妙。卽解有未當。局有未真。皆在所略。故每有平淺無奇之文。而名家反得其用。又不可不知。凡程墨

凡文棄實而取虛。棄勁而取柔。棄古雅而取俗惡。棄樸直明白而取含糊輕巧。皆病中人心。而事關氣運。非細故也。近時論文。直至股尾虛字。亦以乎哉爲硬。而止用歟字。以矣字耳字爲直。而變用已字爾字。此種議論。不知起自何人。知其心術品行。必至污極下而不可問者。至章句辭采。古人無一字無來歷。出於經傳爲上。出於子史古文者次之。湯霍林川冰兢二字。鍊經語無法。艾千子猶譏笑其不通。今則但鄙滿幅王半山悔變秀才爲學究。不知今又變學究爲白丁也。是集辭而闢之。廓如矣。凡大題

先生論文以意思義論爲主。不在機調意論達。則機調自生。凡一
翻一正一開一折。定有頭一皮。庸陋見識套數。先到先生謂必
須撥過此番。然後寫真意思。好義論出。若人人心手必然萬喙
一律者。斷無可取。凡例

呂子評語餘編卷八終

呂子評語餘編附刻

親炙錄

作文所以講明義理。非止要文義通達而已。世人多岐講學與作文爲二。最是謬見。

詩文有三字訣曰熟裏生。

詩文一道也。縮一篇長文於八句之中。故求精甚難。其妙都在神理。不在詞句。古人詩中嘗有一二語雪淡處。却意味無窮者。今人多不識也。

問詩有含蓄者。有說盡者。是各隨體格否。曰。然。然須是說盡處。仍自含蓄不盡。所以爲難。

或語余曰。吾子詩固佳。惜落宋人詩派耳。余問宋詩何故不好。曰。詩本性情。宋人慣說道學。失却詩中意趣。余曰。天生蒸民。有物

有則民之秉彝好是懿德。非說道學耶。然則三百篇亦欠好矣。其人慙然。又言詩貴有臺閣氣象。宋人詩太寒餓。余曰。子美盛唐人。其詩曰。歲拾橡栗隨狙公。天寒日暮山谷裏。何等寒餓。集中如此類。不一而足。然則子美亦不得爲詩人耶。其人又慙然。問先生所著文何如。曰。吾文不佳。惟與人往復書。中有議論關係者。不可沒。餘並不欲存之。本意此去欲勉爲之。不奈今已病矣。休矣。異日將以此事付公等耳。

呂子評語餘編附刻終